

ԱՐՄԻՆԻՅԱ ԱՐԱԲԱԿԱՆ ՆԱՀԱՆԳԻ
ՍԱՀՄԱՆՆԵՐՆ ՈՒ ՎԱՐՁԱՏԱՐԱԾՔԱՅԻՆ
ԲԱԺԱՆՈՒՄԸ ԸՍՏ ԱՐԱԲԱԳԻՐ
ՍԿՁԲՆԱՂԲԻՒՐՆԵՐԻ

ԱՐՄԷՆ ՇԱՀԻՆԵԱՆ
a_shaginyan@mail.ru

Թ. դարի կէսերից արագօրէն սկսեց ձեւաւորուել արաբագիր մատենագրութիւնը՝ այդ թուով աշխարհագրական գրականութեան դպրոցը: Այդ դպրոցի արաբ ու պարսիկ ներկայացուցիչներից առաջինները՝ Իբն Խուրդադբիհը (մօտ 820-912/3), Իբն Հաուկայը (?-?), Իբն Ռուստան (?-?), Իբն Ալ-Ֆակիհը (?-?), Ալ-Իսթախրին (մօտ 850-934), Կուդաման (մահ. 930/40ականներին) եւ Ալ-Եա'կուբին (մահ. 897ին) ճանապարհորդել են Հայաստան ու յարակից շատ երկրներ եւ թողել հարուստ ու ստոյգ տեղեկութիւններ¹: Համաձայն նրանց, Հայաստանը (արաբ.՝ Արմինիյա), Քարթլին (արաբ.՝ Ջուրգան) եւ Աղուանքը (արաբ.՝ Առան) Արաբական Խալիֆայութեան կազմում (701-886) միաւորուած էին մէկ նահանգի (արաբ.՝ թուր/ա/) մէջ, որը «Արմինիյա» էր կոչուած²:

Կուդամայի խօսքերով, Արմինիյան՝ դա Ջուրգանն է (Քարթլին), Դաբիլը (Դուինը), Սիրաջ-Տայրը (Շիրակն ու Տայքը), Բաջունայսը (Ապահունիքը), Արջիլը (Արճէշը), Խիլատը (Խլաթը), Սիսաջանը (Սիսական/Սիւնիքը), Առանը (Աղուանքը), Կալիկալան (Կարինը), Բասֆուռաջանը (Վասպուրականը) Նաշաւա (Նախճաւան) քաղաքով³: Իբն Ռուստան ներկայացնում է Թ. դարի վերջի Արմինիյա նահանգի խոշոր քաղաքները. Ալ-Բար ալ-Աբուար (Դարբանդ), Բարձա'ա (Պարտաւ), Նաշաւա (Նախճաւան), Սիսաջան (Սիսական), Արգան եւ Խիլատ (Խլաթ)⁴: Արաբագիր մատենագրութեան աշխարհագրական սեռի առաջին՝ Իբն Խուրդադբիհի Քիթաբ Ալ-Մասայիք Ուա Ալ-Մամայիք (ճանապարհների ու թագաւորութիւնների գիրք) երկում Արմինիյայի տեղանունների շարքում յիշատակուում են նաեւ Ալ-Լակզ (Լեկք)⁵, Շիրուան ու Աս-Սանարիյա (Կախէթի) երկրամասերը, Այրակ (Աղբակ) գաւառը, Բայլական (Փայտակարան), Թիֆլիս (Թբիլիսի/Տփղիս), Խուվայյ (Հեր)⁶, Կաբալա (Կապաղակ), Շիմշատ (Արշամաշատ) ու Սուղդաբիլ (Սաղոդերբիլ) քաղաքները եւ Աբխազ, Խայզան, Ալ-Ջարդաման (Գարդման), Աշ-Շաբիրան (Շապորան), Շաքքի (Շաքէ) ու Քիսալ (Կասակ) բերդերը⁷: Ենթա-

խորքից էլ հետեւում է, որ Շիմշատի (Արշամաշատի) ու Հիսն Չիյադի (Անձիտ/Հոռէ բերդի) միջեւ էր անցնում Արմինիայի հարաւ-արեւմտեան սահմանը, իսկ արեւմուտքում նրա սահմանը հասնում էր մինչեւ (Բիւզանդական) Խալդիայի (Խաղտիքի) բանակաթեմը: Հետեւում է նաեւ, որ Արմինիայի հիւսիսային սահմանով՝ Ալ-Կարկ (Մեծ Կովկասի) լեռներում, ինչպէս նաեւ հիւսիս-արեւմտեան (Բիւզանդիայի հետ) սահմանով մէկ կառուցուած էին հզօր բերդ-դարպասներ: Ալ-Բար Ալ-Արուարը (Դարբանդը), Բար Սահիբ Աս-Սարիրը (Սարիրի Պահակի Դուռը), Բար ալ-Լանը (Ալանաց Դուռը), Բար Ֆիրուզ Կուբաձը (Փիրուզ Կաւաղի Դուռը), Բար Լաճիկան (Լազիկայի Դուռը), Բար Սամսախին (Սամցխէի Դուռը) եւն.⁸:

Այսպիսով, հիւսիսում Արմինիայի սահմաններն անցնում էին Խազարական Խաքանութեան հետ Արարական Խալիֆայութեան պետական սահմանով (Մեծ Կովկասի լեռնաշղթայով), իսկ հիւսիս-արեւմուտքում եւ արեւմուտքում՝ Բիւզանդական Կայսրութեան հետ պետական սահմանով (Լիխի/Սուրամի, Մոսքական/Մեսխէթի եւ Խաղտեաց/Լազիստանի լեռնաշղթաներով): Հարաւ-արեւմուտքում այն սահմանակից էր արարական Աս-Սուղուր Ալ-Չազարիյյա (Միջագետքի սահմանային գօտուն Արշամաշատի կողմից), հարաւում՝ արարական Ալ-Չազիրա (Վերին Միջագետք) նահանգին (Հայկական Տաւրոսով, Կորդուաց ու Ջողայի լեռներով), իսկ հարաւ-արեւելքում՝ արարական Աձարբայան նահանգին (Կոտուր-Չազրոշի լեռնաշղթայով, ապա Կոտուր, Արաքս ու Կուր գետերով): Արեւելքում Արմինիայն ողողւում էր Կասպից Մովով:

Այս վարչական սահմաններից դուրս, Արարական Խալիֆայութեան (Աս-Սուղուր Ալ-Չազարիյյայի) կազմում մնացին պատմական Փոքր Հայքի հարաւային բոլոր գաւառները, ինչպէս նաեւ Բարձր Հայքի (Աղիւն, Դարանաղի, Եկեղեաց եւ Մուզուր) ու Մոփքի (Անձիտ, Գաւրէք, Դեգիք եւ Մոփք Շահունի) արեւմտեան գաւառները: Նրանք բոլորը ընդգրկուեցին Աս-Սուղուր սահմանային գօտու կազմում: Դրա մասին է վկայում նաեւ Կամախի ու Մալատիայի (Մելիտենէի) առկայութիւնը Իրն Խուրդադրիհի Աս-Սուղուր Ալ-Չազարիյյայի տեղանունների ցանկում⁹:

Միեւնոյն ժամանակ Հայաստանի էթնիկ սահմանները այս կողմերում անփոփոխ մնացին: Արարների օրօք հայերը այստեղ շարունակում էին կազմել ազգային մեծամասնութիւն: Պատահական չէ, որ մօտ 930ին Ալ-Իսթախրին, իսկ 977/8ին՝ Իրն Հաուկայը տուեալ տարածաշրջանը կոչում են Ալ-Արման (հայոց երկիր)¹⁰:

Արմինիայի սահմաններից դուրս մնացին նաեւ Մեծ Հայքի մի շարք հարաւային գաւառներ: Օրինակ՝ Ալ-Չազիրայի մաս էին կազմում Աղձնիքի արեւմտեան՝ Անգեղատուն եւ Նփրկերտ գաւառները, ինչպէս նաեւ Կորճայքի Կորդուք գաւառը: Դրա մասին է վկայում նաեւ նոյն

Իրն Խուրդադրիհի Ալ-Ջազիրայի տեղանունների ցանկում Մայաֆա-
րիկին (Նփրկերտ) ու Ալ-Ջազիրա/Ջազիրաթ Իրն Ռամար (Բզարդէ) քա-
ղաքների, Կարդա (Կորդուք) գաւառի ու Ալ-Չուդիյ (Արարադ) լեռան
առկայութիւնը¹¹: Իսկ Աձարբայջանի¹² մաս էին կազմում Վասպուրա-
կանի արեւելեան՝ Բաք(ր)ան/Մարանդ, Գարիթեան եւ Պարսպատունիք
գաւառները, ինչպէս նաեւ Պարսկահայքի եւ Փայտակարանի բոլոր գա-
ւառները, բացի Հրաքոտ-Պերոժից: Դրա մասին է վկայում դարձեալ
Իրն Խուրդադրիհի այս անգամ Աձարբայջանի տեղանունների ցանկում
Արաքսից հարաւ գտնուող Բաջարւան (Բագաւան), Բարզանդ, Մա-
րանդ ու Վարսան (Վարդանակերտ) քաղաքների, Մուկան (Մուղան)
դաշտավայրի, ինչպէս նաեւ Ուրմիա լճի աւազանից հիւսիս-արեւմուտք
գտնուող Սալմաս(տ), Ուրմիյա (Որմի) ու Խուվայյ (Հեր) քաղաքների
առկայութիւնը¹³: Հարկ է նշել, որ այս բոլոր տեղանունները արաբա-
գիր միւս աշխարհագիրների մօտ մենք նոյնպէս գտանք «Աձարբայջան»
հատուածում¹⁴: Իրն Ալ-Ֆակիհն էլ յստակ ասում է, որ Աձարբայջանի
սահմանները (հիւսիսում) հասնում էին մինչեւ Առ-Ռասը (Արաքսը)¹⁵:

Հետաքրքրական է նշել, որ արաբ պատմիչ Ալ-Բուֆին (մահ. 926ին)
պահպանել է մի կարճ հաղորդագրութիւն, որը որոշ չափով լուսարա-
նում է վերոյիշեալ գաւառների էթնիկ պատկերը արաբների օրօք: Նրա
խօսքերով, փոխարքայ Մարուան Իրն Մուհամմադը հիջրայի 123ին
(740/1) «...վերագրուեց անբող Աձարբայջանը՝ հողեր, որտեղ [շա-
րունակում էին] բնակուել հայերը...»¹⁶:

Այսպիսով, մենք առաջարկում ենք Կլոդ Մուլթաֆեանի եւ Էրիկ Վան
Լուէի¹⁷, ինչպէս նաեւ Բաբկէն Յարութիւնեանի¹⁸ Հայաստանի
պատմութեան ատլասներում Արմինիյային վերաբերող քարտէզներում
Արմինիյայի հարաւային (Ալ-Ջազիրա եւ Աձարբայջան նահանգների
հետ) սահմանագծում կատարել հետեւեալ ճշգրտումները: Մի ղէպքում
Արմինիյայի կազմում հարկաւոր է ընդգրկել Աղձնիքի Արզան գաւա-
ռը¹⁹, միւս ղէպքում՝ Արմինիյայի կազմից անջատել Պարսկահայքի 5 վե-
րին գաւառները՝ Առնան, Չարաւանդը, Չարեհաւանը, Հերն ու Տամբե-
րը, եւ Վասպուրականի 3 արեւելեան գաւառները՝ Բաք(ր)ան/Մարան-
դը, Գարիթեանն ու Պարսպատունիքը:

Ճշտելով Արմինիյայի արտաքին սահմանները՝ մեզ մնում է որոշել
նրա վարչական միաւորների քանակը, ներքին սահմաններն ու տարած-
քը:

Ժամանակակից արեւելագիտութիւնը վաղուց է հաստատել այն տե-
սակէտը, թէ՛ Արմինիյան ունեցել է քառեակ բաժանում: Վերոյիշեալ
սկզբնաղբիւրներից մի քանիսում մենք իսկապէս կարող ենք գտնել
այդպիսի տեղեկութիւններ:

Առաջին այդպիսի սկզբնաղբիւր է Եգիպտոսում ծնուած պատմիչ
Ալ-Բալաձուրիի (մահ. 892) կողմից 860ականների երկրորդ կէսին հեղի-

նակած *Քիթար Տութուհ Ալ-Բուլղան* (երկրների նուաճման գիրք) երկը, որում տեղ են գտել Բարձա՛ալի (Պարտաւ) ու Դարիլի (Դուին) նախկին բնակիչների բանաւոր վկայութիւնները՝ Արմինիայի քառեակ բաժանման վերաբերեալ: Այսպէս, մի տարբերակում կարողում ենք. «Շիմշատը, Կալիկալան, Խիլատը, Արջիշն ու Բաջունայսը կոչում էին Արմինիայ Չորրորդ; Ալ-Բուսֆուտաջան աշխարհը, Դաբիլը, Սիրաջ-Տայրն ու Բադրաւանը՝ Արմինիայ Երրորդ; Ջուրգանն էլ [Արմինիայ] Երկրորդ; իսկ Աս-Սիսաջանն ու Առ-Ռանը [Արմինիայ] առաջին»: Համաձայն միւսի. «Արմինիայ Չորրորդը բաղկացած էր միայն Շիմշատից; Կալիկալան էլ, Խիլատը, Արջիշն ու Բաջունայսը կոչում էին Արմինիայ Երրորդ; Սիրաջ-Տայրը, Բադրաւանը, Դաբիլն ու Ալ-Բուսֆուտաջանը [Արմինիայ] Երկրորդ, իսկ Աս-Սիսաջանը, Առ-Ռանն ու Թիֆլիսը [Արմինիայ] Առաջին»²⁰:

Արաբագիր աշխարհագիրներից 4 Արմինիաների մասին առաջինը մօտ 885ին գրում է Իբն Խուրդադբիհը. «Արմինիայ Առաջինն է՝ Աս-Սիսաջանը, Առանը, Թիֆլիսը, Բարձա՛ան, Ալ-Բայլականը, Կարալան եւ Շիրուանը:

Արմինիայ Երկրորդն է՝ Ջուրգանը, Սուդղաբիլը, Բաբ Ֆիրուզ Կուրածը եւ...:

Արմինիայ Երրորդն է՝ Ալ-Բուսֆուտաջանը, Դաբիլը, Սիրաջ-Տայրը, Բադրաւանը եւ Նաշաւան:

Արմինիայ Չորրորդն է՝ Շիմշատը, Խիլատը, Կալիկալան, Արջիշը եւ Բաջունայսը»²¹:

Նոյն բանը հիջրալի 290ին (902/3) բառացիօրէն կրկնում է Իբն Ալ-Ցակիհը²²:

Այս տեղեկութիւններից հետեւում է, որ Արմինիայ Ա-ը - եթէ դուրս թողնենք Թիֆլիսը - ընդգրկում էր նախկին Սասանեան Իրանի Աղուանից Մարզպանութիւնը եւ հայոց Սիւնիքը. Արմինիայ Բ-ը՝ նախկին Սասանեան Իրանի Վրաց Մարզպանութիւնը: Մնացած երկու Արմինիաները ընդգրկում էին միայն հայկական տարածքներ. Արմինիայ Գ-ը՝ պատմական Մեծ Հայքի Այրարատ, Վասպուրական, Մոկք, Տայք եւ Կորճայք աշխարհների բոլոր գաւառները, բացի Կորդուքից, իսկ Արմինիայ Դ-ը՝ Աղձնիք, Բարձր Հայք եւ Ծոփք աշխարհների արեւելեան եւ Տուրուբերանի բոլոր գաւառները:

Ի տարբերութիւն այս հաղորդագրութիւնների՝ Ալ-Եա՛կուբիի կողմից հիջրալի 278 (891/2)ին հեղինակած *Քիթար Ալ-Բուլղան* (երկրների գիրք) երկում տրւում է Արմինիայի եռեակ բաժանում.

«Առաջին մասում են՝ Դաբիլ, Կալիկալա, Խիլատ ու Շիմշատ... քաղաքները:

Երկրորդ մասում են՝ Բարձա՛ա, Ալ-Բայլական, Կարալա եւ Ալ-Բաբ Ալ-Արուսք քաղաքները:

Երրորդ մասում են՝ Չորգանն ու Թիֆլիսը»²³։

Եռեակ բաժանումով ստացում է հետեւեալը․ Արմինիյա Ա․ը ընդգրկում էր բուն Հայաստանը, Արմինիյա Բ․ը՝ Աղուանքը, իսկ Արմինիյա Գ․ը՝ Քարթլին։ Այսպիսով, Ալեւա՛կուբի մօտ Արմինիյայի վարչական միաւորների քանակը համապատասխանում է տարածաշրջանի երկրների թուին, իսկ տարածքները՝ նրանց այն ժամանակուայ սահմաններին։ Միեւնոյն ժամանակ միաւորների յաջորդական համարները նրա մօտ լիովին տարբերում են միւսներից։ Պատմագիտութեանը յայտնի փաստ է, որ Խորասանում ծնուած Ալեւա՛կուբին երիտասարդ ժամանակ (Թ․ դարի առաջին կէս) երկար տարիներ պետական ծառայութեան մէջ է եղել Արմինիյայում²⁴, որտեղ իր նախապապը՝ Վազիհ Ալեւաբասին, 775ին նահանգապետ էր։ Այնպէս որ, այս հեղինակի Արմինիյայի աշխարհագրութեանը եւ վարչատարածքային բաժանմանը վերաբերող բոլոր նիւթերը պէտք է քաղուած լինէին պաշտօնական աղբիւրներից, հետեւաբար, ունեն բացառիկ բնոյթ։

Հաշուի առնելով այս կարեւոր հանգամանքը, ինչպէս նաեւ Ալեւալաճուբի մօտ վարչական միաւորների շուրջ առկայ տարակարծութիւնները եւ միւս արարագիր սկզբնաղբիւրներում, ինչպէս նաեւ ժամանակի հայ մատենագիրների մօտ Արմինիյայի քառեակ բաժանման մասին տեղեկութիւնների բացակայութիւնը՝ յստակ կարելի է առարկել, որ Արարական Խալիֆայութեան հիւսիսային նահանգը ունեցել է եռեակ, այլ ոչ թէ քառեակ բաժանում։ Ինչ վերաբերում է Ալեւալաճուբի եւ միւս երկու մատենագիրների մօտ տեղ գտած հաղորդագրութիւններին, ապա դրանք, հաւանական է, բիւզանդական Հայաստանի 536ից յետոյ յայտնի քառեակ բաժանման պատմական յիշողութիւնից են։ Աւելին, արարագիր մատենագիրները եւ Սասանեան Իրանն էին աւանդաբար ներկայացնում այդպիսի քառեակ բաժանմամբ, եւ իրենց յայտնի ամբողջ աշխարհը։

Միեւնոյն ժամանակ, սակայն, պէտք է խոստովանել, որ Ալեւա՛կուբին ունի պատմական մի երկ՝ Քարթլիս (պատմութիւն) վերնագրով, որտեղ նա մէկ անգամ յիշատակում է «Արմինիյա Չորրորդ» (արաբ․՝ Արմինիյա Առեւարի՛ա) եզրը²⁵։ Այս նոյն եզրը մէկ անգամ յայտնաբերեցինք նաեւ արարական պատմագրութեան հիմնագիրներից մէկի՝ իրաքցի պատմիչ Խալիֆա Իբն Խայբաթի (776/7-851) մօտ²⁶։ Սակայն սրանց երկերում չկան Արմինիյա Ա․, Արմինիյա Բ․, ոչ էլ Արմինիյա Գ․ հասկացութիւնները։ Իսկ ենթախորքից հետեւում է, որ խօսքը վերաբերում է Բիւզանդիային սահմանակից պատմական Չորրորդ Հայքին, որ է Մոփաց կողմն, յետագայում՝ Բիւզանդական Չորրորդ Հայք պրովինցիային, որն արաբների օրօք արդէն ունէր ոչ թէ վարչական միաւորի նշանակութիւն, այլ՝ պատմաաշխարհագրական մարզի²⁷։

Եւ այսպէս, Արմինիյան փաստօրէն բաղկացած էր Հայաստանից՝ Գուին կենտրոնով, Քարթլիից՝ Թբիլիսի կենտրոնով եւ Աղուանքից՝ Պարտաւ կենտրոնով: Այնպէս որ, վերոյիշեալ ատլասները վերահրատարակելիս, հեղինակներին կ'առաջարկէինք հաշուի առնել նաեւ այս փաստը:

Յայտնի արաբագէտ Արամ Տէր-Ղեւոնդեանը գտնում էր, որ արաբների օրօք Արցախն ու Սիւնիքը միանշանակ եղել են Հայաստանի կազմում²⁸: Սիւնիքի վերաբերեալ նոյն տեսակէտն է յայտնում Նինա Գարսոյեանը²⁹: Սակայն արաբագիր մատենագիրների վերոյիշեալ տեղեկութիւնները ցոյց են տալիս, որ պատմական Մեծ Հայքի հայապատկան այս աշխարհները բացակայում են Հայաստանի տեղանունների արաբական ցանկերից: Աւելին՝ բոլոր արաբագիր աշխարհագիրները միաձայն պնդում էին, որ Աս-Սիսաջանը (Սիսական/Սիւնիքը) Առ-Ռանի (Աղուանքի) կազմում է: Հետեւաբար, մեկնելով նրանց նշած տեղեկութիւններից՝ Սիսական/Սիւնիքից դէպի արեւելք գտնուող Արցախը չէր կարող յայտնուել այդ շրջանի Հայաստանի կազմում: Նշենք, որ արաբական Հայաստանի տեղանունների ցանկերից բացակայում էր նաեւ Գուգարք Աշխարհը: Անկասկած նա շարունակում էր Սասանեանների ժամանակաշրջանից սկսած գտնուել հարեւան Քարթլիի կազմում:

Արաբագիր մատենագրութիւնում Արմինիյան յաճախ շփոթւում է բուն Հայաստանի հետ, սակայն ենթախորքից գրեթէ միշտ էլ կարելի է որոշել թէ ինչի մասին է խօսքը՝ միայն Հայաստանի³⁰, թէ՞ ամբողջ նահանգի:

Իրն Ալ-Ֆակիրը հիջրայի մօտ 290 (902/3)ին, վկայակոչելով Ալ-Ես'կուբիին, Արմինիյայում հաշուում է 113 թագաւորութիւն/իշխանութիւն (արաբ․՝ մամլաթա) եւ 18 հազար զիւղատեղ (արաբ․՝ կարիյա)³⁰: Մենք համոզուած ենք, որ տուեալ պահին աշխարհագիրը նկատի ունի միայն Հայաստանը: Ոստելով զիւղտեղերի քանակի մասին, նա նշում է, որ եւս 4 հազարը գտնուում են (հարեւան) Առանի (Աղուանքի) տարածքում³¹:

Սկզբնաղբիւրների վերոյիշեալ դրուագների վերլուծութիւնը, ինչպէս նաեւ իրն Ալ-Ֆակիրի Արմինիյայի 113 թագաւորութիւնների/իշխանութիւնների վերաբերեալ տեղեկութիւնը թոյլ են տալիս մեզ եզրակացնել, որ Հայաստանը (Արմինիյա Ա.ը) ընդգրկում էր պատմական Մեծ Հայքի 9 աշխարհների հետեւեալ 113 գաւառները.

1. Աղձնիք (17.532 քառ. կլմ.): 11 գաւառներից չեն ընդգրկուել միայն 2ը՝ Անգեղտունը եւ Նփրկերաը (7.825 քառ. կլմ. ընդհանուր մակերեսով).

2. Այրարատ (40.105 քառ. կլմ.): Ընդգրկուել են բոլոր 22 գաւառները.

3. Բարձր Հայք (23.860 քառ. կլմ.): 9 գաւառներից չեն ընդգրկուել 5ը՝ Աղիւնը, Դարանաղին, Եկեղեացը, Մուզուրը եւ Սպերը (15.735 քառ. կլմ. ընդհանուր մակերեսով)։

4. Վասպուրական (40.870 քառ. կլմ.): 35 գաւառներից չեն ընդգրկուել միայն 3ը՝ Բաք(ր)անը/Մարանդը, Գարիթեանը եւ Պարսպատունիքը (11.925 քառ. կլմ. ընդհանուր մակերեսով)։

5. Կորճայք (14.707 քառ. կլմ.): 11 գաւառներից չի ընդգրկուել միայն 1ը՝ Կորդուքը, (5.825 քառ. կլմ. մակերեսով)։

6. Մոկք (2.962 քառ. կլմ.): Ընդգրկուել են բոլոր 8 գաւառները։

7. Տայք (10.179 քառ. կլմ.): Ընդգրկուել են բոլոր 8 գաւառները։

8. Տուրուբերան (25.008 քառ. կլմ.): Ընդգրկուել են բոլոր 16 գաւառները։

9. Մոփք (18.890 քառ. կլմ.): 8 գաւառներից չեն ընդգրկուել 4ը՝ Անձիտը, Գաւրէքը, Դեգիքը եւ Մոփք Շահունին (8.200 քառ. կլմ. ընդհանուր մակերեսով)։

Հիմք ընդունելով Հայաստանի պատմական քարտեզագրութեան հիմնադիր, Ակադեմիկոս Սուրէն Երեմեանի կողմից կատարած հաշուարկները³², այս 113 գաւառների (ահա թէ ինչ նկատի ունէր Իբն Ալ-Ծակիհը) ընդհանուր մակերեսը մեր հաշուարկով կազմում էր 144.603 քառ. կլմ.: Այժմ մենք կարող ենք որոշել Արմինիայի միւս վարչական միաւորների եւ ամբողջ նահանգի մակերեսը։ Առանի, կամ Արմինիյա Բ-ի սահմանները Աղուանից Մարզպանութեան ժամանաշրջանի համեմատ ընդլայնուել էին Սիւնիքի (15.237 քառ. կլմ.) հաշուին։ Այսինքն՝ նրա տարածքը կազմում էր 87.441 քառ. կլմ.: Չուրզանի, կամ Արմինիյա Գ-ի, սահմանները, ինչպէս նշեցինք, մնացին անփոփոխ Վրաց Մարզպանութեան ժամանակաշրջանից։ Այսինքն՝ նրա տարածքը կազմում էր 38.988 քառ. կլմ.: Այսպիսով, ամբողջ Արմինիայի մակերեսը հաւասար էր 271.032 քառ. կլմ.։

Ստացւում է, նահանգի խոշորագոյն միաւորը Հայաստանն էր, որին հետեւում էր Աղուանքը, ապա նոր՝ Քարթլին։ Ահա թէ ինչ սկզբունքով էին առաջնորդուում արաբ խալիֆները՝ Արմինիայի վարչական միաւորները համարակալելիս։

ՄԱՆՕԹԱԳՐՈՒԹԻՒՆ

¹ Այս եւ միւս աշխարհագիրների երկերը տե՛ս՝ *الكلمة الجغرافية العربیة* - *Biblioteca Geographorum Arabicorum*, M. de Goeje (ed.), Pars. I-VIII, Lugduni Batavorum, 1870-1892.

² Ընդհանրապէս արարները Խալիֆայութիւնը բաժանել էին մի շարք նահանգների, որոնց թիւը փոփոխական էր։ Արարների կողմից Հայաստանի եւ հարակից կասեան երկրների վերջնական նուաճման մասին տե՛ս՝ Ստեփան Մելիք-Բախչեան, *Հայաստանը VII-X Դարերում*, Երեւան, 1968, էջ 96-108. նաեւ՝ Aram Ter-Gevondian, *Armeniya I Arabskii Khalifat*, Երեւան, 1977, էջ 71-4. նաեւ՝ Nina Garsoian, "The Arab Invasions and

the Rise of the Bagratuni (640–884)”, in *The Armenian People from Ancient to Modern Times*, ed. by Richard Hovannisian, 1, New York, 1997, էջ 125-6. նաև՝ A. Shaginian, *Armeniya Nakamne Arabskogo Zavoevaniya*, Մ. Պետերբուրգ, 2003, էջ 103-6:

³ *Biblioteca*, P. VI, էջ 246:

⁴ Նոյն, P. VII, էջ 98:

⁵ Հաւանական է որ սա է հիմք հանդիսացել Բ. Յարութիւնեանի համար՝ Ալ-Լակզ (Աեկզ/լեզգիներ) երկրամասը ընդգրկելու Արմինիյա նահանգի կազմում (Բարկէն Յարութիւնեան, *Հայաստանի Պատմութեան Առյաւ, Մաս Ա.*, Երեւան, 2004, էջ 56-7 եւ 58-9): Նշենք նաև, որ արարազիր միւս մատենագիրների մօտ Ալ-Լակզը յստակ թագարական թագանութեան կազմում էր: Ի դէպ, հիւսիսային կովկասի երկրամասերը թուրկելիս Իրն Խուրդաղբիհի մօտ դարձեալ հանդիպում ենք այս տեղանունան (*Biblioteca*, P. VI, էջ 124):

⁶ Խուլպայի (Հեր) առկայութիւնը այստեղ, մեր կարծիքով, թիւրիմացութիւն է: Բանն այն է, որ այն կարելի է գտնել նաև նոյն Իրն Խուրդաղբիհի հարեւան Աճարբայջան արարական նահանգի քաղաքների ցանկում (տե՛ս՝ *ibid*, էջ 119): Աւելին, արարազիր միւս մատենագիրների մօտ Խուլպայը նոյնպէս Աճարբայջանի կազմում է:

⁷ Նոյն, էջ 122-123:

⁸ Նոյն, էջ 100, 123:

⁹ Նոյն, էջ 97: Մալատիյան (Մելիտինէ) արարազիր այլ մատենագիրներ նոյնպէս տեղադրում են Աս-Սուդուր Ալ-Ջազարիյյա սահմանային գօտում (օրինակ՝ *Biblioteca*, P. VII, էջ 106-107): Պատմական Փոքր Հայքի հիւսիսային բոլոր գաւառները Բիւզանդիայի կազմում էին: Իրն Խուրդաղբիհի Աս-Տումի քաղաքների թւում յիշատակում է Կուլունիյան (Կոլունիա) ու Սարատիյան (Սերաստիա, տե՛ս՝ *ibid*, P. VI, էջ 108 եւ 117):

¹⁰ Նոյն, P. I, էջ 180-181, P. II, էջ 237: Այս եզրը կարելի է հանդիպել նաև միւսների մօտ:

¹¹ Նոյն, P. VI, էջ 76, 95: Մայլաֆարկինը (Նփրկերա) ու Կարդան (Կորդուք) յօդուածում յիշատակուած միւս մատենագիրները նոյնպէս տեղադրում են Ալ-Ջազիրա նահանգում (օրինակ՝ *ibid*, P. VII, էջ 106):

¹² Աճարբայջանը Արարական Թալիֆայութեան կազմում ինքնուրոյն նահանգ էր, որն զբաղեցնում էր այսօրուան Իրանական Աղբբեջանի (պատմական Ատրպատականի) տարածքը:

¹³ Նոյն, P. VI, էջ 119:

¹⁴ Իրն Ռուստայի (*ibid*, P. VII, էջ 106), Կուրդամայի (*ibid*, P. VI, էջ 244) Իրն Ալ-Ֆակիհի (*ibid*, P. V, էջ 284-285), Ալ-Իսթախրի (*ibid*, P. I, էջ 181-182) եւ Իրն Հաուկայի (*ibid*, P. II, էջ 239) մօտ:

¹⁵ Նոյն, Vol. V, էջ 296:

¹⁶ كتاب الفتح باب محمد احمد بن ابي بكر - *Kitabu'l Futuh by Abu-Muhammad Ahmad Ibn Atham Al-Kufi*, ed. by Abdu'l Muid Khan, Sayid Abdu'l Wahhab Bukhari, 8, Hyderabad, 1395 A.H. / 1976 A.D., էջ 82: Ինչպէս շատ կարութիւններում, Թալիֆայութեան վարչական բաժանման հիմքում էթնիկ սահմանները հաշուի չեն առնուել: Թալիֆները առաջնորդուել են զուտ պետական շահերից: Իրա վառ ապացոյցն է այն, որ հայարնակ մի շարք գաւառներ յայտնուեցին հարեւան Աճարբայջան, կամ Ալ-Ջազիրա նահանգների կազմում:

¹⁷ Claude Mutafian & Eric Van Lauwe, *Atlas Historique de l'Arménie. Proche-Orient et Sud-Caucase du VIII^e siècle av. J.-C. au XXI^e siècle*, Paris, 2001, էջ 45:

¹⁸ Յարութիւնեան, էջ 56-57 եւ 58-59:

- ¹⁹ Այն, որ Արզանը Արմինիայի կազմում էր, նշում է ոչ միայն իրն Ռուստան, այլև՝ իրն Հաուկայը (տե՛ս՝ Bibliotheca, P. II, էջ 344)։
- ²⁰ کتاب فتوح البلدان تأليف الامام ابى العباس احمد بن يحيى البلاذري — *Liber Expugnationis Regionum Auctore Imamo Ahmed Ibn Jahja Ibn Djabir al-Beladsori*, ed. M. de Goeje, Lugduni Batavorum, 1866, էջ 194։
- ²¹ Bibliotheca, P. VI, էջ 122։
- ²² Նոյն, P. V, էջ 286, 287. նաև՝ Nekatoriye Neopublikovanniye Glavy Truda Ibn Al-Fakikha "Akhbar Al-Buldan" po Meshkhedskoi Rukopisi թրգմ.՝ Ա. Ժամկոչևան, Երևան, 1979, էջ 100a (89)։
- ²³ Bibliotheca, P. VII, էջ 364։
- ²⁴ Ահա թէ ինչ է այդ մասին վկայում իրն Ալ-Ֆակիր՝ Ահմադ իրն Վազիր Ալ-Ես'կուրի)։ «... յայտնեց [ինձ այն մասին], որ նա երկար տարիներ է ապրել Հայաստան երկրում (այսինքն Արմինիայում - Ա.Շ.) և ատենադպիր եղել նրա շատ արքաների (այսինքն՝ իշխանների - Ա.Շ.) ու կառավարիչների մօտ...» (Bibliotheca, P. V, էջ 290-1)։
- ²⁵ *Տե՛ս՝* تاريخ احمد بن ابى يعقوب بن حنبل بن وهب بن اعين واصح الكتاب القياس المعروف بالعقوى *Ibn Wadhiih Qui Dicitur Al-Ja'qubi, Historiae*, ed. M. Houtsma, 2, Lugduni Batavorum, 1883, p. 378։
- ²⁶ تاريخ خليفة بن خياط - *The History of Khalifah ibn Khayyat*, ed. by Akram Diya' al-Umari, Nagav, 1386-1387 A.H. / 1967 A.D. էջ 436։
- ²⁷ Ի դէպ, Չորրորդ Հայք եզրը հանդիպում է տուեալ ժամանակաշրջանի ոչ միայն արարական մատենագրութիւնում, այլև՝ ասորական և բիզանդական։
- ²⁸ Ter-Gevondian, էջ 166 և քարտէզ։
- ²⁹ Garsoian, էջ 119 (քարտէզ թիւ 8)։
- ³⁰ Bibliotheca, P. V, էջ 290-91։
- ³¹ Նոյն, էջ 291։
- ³² Մուրէն Երեմեան, Հայաստանը Ըստ Աշխարհացոյցի (Փորձ VII Դարի Հայկական Քարտէզի Վերակազմութեան Ժամանակակից Քարտէզագրական Հիմքի Վրայ), Երևան, 1963, (Յաւելուած Բ.), էջ 116-120։

THE ADMINISTRATIVE AND TERRITORIAL DIVISION OF
THE ARAB PROVINCE OF *ARMINIYA* AND ITS FRONTIERS ACCORDING TO
ARABIC SOURCES

(Summary)

ARSEN K. SHAHINYAN

a_shahinyan@mail.ru

According to the first Arabic geographers and historians (9th-10th centuries), Armenia (arab. *Arminiya*), Eastern Georgia/Kartli (arab. *Jurzan*) and Caucasian Albania (arab. *Ar-Ran*) constituted the single province of *Arminiya* in the Arab Caliphate (701-886).

On the north *Arminiya* bordered the Khazar Khaganate (delimited by the Great Caucasian Mountain range). It coincided with the state borders of the Arab Caliphate. In the north-west and the west *Arminiya's* neighbor was the Byzantine Empire (delimited by the Likh, Meskheti and Lazistan mountain ranges). In the south-west *Arminiya's* frontiers reached to the fortified Arab border zone of As-Sughur (near the city of Arshamashat). The Arab province of al-Jazira (Upper Mesopotamia) flanked its southern border (delimited by the Armenian Taurus and Kurdish mountains). The Arab province of Adharbayjan (delimited by the Kotur-Zagros mountain range and the Kotur, Araxes and Kur rivers) constituted its south-eastern neighbor, and on the east *Arminiya* was washed by the Caspian Sea.

Basing his suggestions on Arabic sources, the author suggests certain modifications to the maps, which are currently in circulation. He recommends including the Arzan region in the *Arminiya* province, while excluding the five upper regions of Persoarmenia and the three eastern regions of Vaspurakan. He notes, however, that the Caliphate had not divided its conquered areas according to ethnic criteria. Rather he underlines that several areas which were populated by ethnic Armenians were combined with non-Armenian areas.

On another note, the author refutes the long-standing view that *Arminiya* consisted of four administrative units, namely *Arminiya I* (i.e. Albania), *Arminiya II* (i.e. Kartli), *Arminiya III* and *Arminiya IV* (i.e. Armenia). The author supports his argument by referring to the distinguished Arab historian and geographer Al-Ya'kubi (d. 897). The latter was very familiar with Armenia, as his grandfather, Wadih 'Abbas, had been its governor in 775 and he himself had served there during his youth. Al-Ya'kubi testifies that *Arminiya* consisted of three administrative units, namely *Arminiya I* (i.e. Armenia) with Dabil/Dvin as its capital, *Arminiya II* (i.e. Albania) with Bardha'a/Partav as its capital and *Arminiya III* (i.e. Kartli) with Tiflis/Tbilisi as its capital.

Finally, the author calculates the area of the province of *Arminiya*, which sums up to 271,032 sq. kms.